

欽定四庫全書

東坡全集卷 九十八

宋蘇軾撰頌一十七首

阿彌陀佛頌（并叙）

錢塘圓照律師，普勸道俗，歸命西方極樂世界阿彌陀佛。眉山蘇軾，敬捨亡母蜀郡太君程氏遺留簪珥，命工胡錫，采畫佛像，以薦父母冥福。謹再拜稽首，而獻頌曰：

佛以大圓覺，充滿河沙界。  
我以顛倒想，出沒生死中。  
云何以一念，得往生淨土？  
我造無始業，本從一念生。  
既從一念生，還從一念滅。  
生滅滅盡處，則我與佛同。  
如投水海中，如風中鼓橐。  
雖有大聖智，亦不能分別。  
願我先父母，與一切衆生。  
在處為西方，所遇皆極樂。  
人人無量壽，無往亦無來。

蘇軾《東坡志林》第二卷《道釋》

〈付僧惠誠游吳中代書十二〉：

杭州圓照律師，志行苦卓，教法通洽，晝夜行道二十餘年矣，無一念頃有作相。自辨才歸寂，道俗皆宗之。

大佛頂如來密因修證了義諸菩薩萬行首楞嚴經卷第六

唐天竺沙門般刺蜜帝譯

初於聞中，入流亡所，所入既寂，動靜二相，了然不生，如是漸增，聞、所聞盡，盡聞不住，覺、所覺空，空覺極圓，空、所空滅，生滅既滅，寂滅現前。

【經文資訊】大正藏第 19 冊 No. 0945 大佛頂如來密因修證了義諸菩薩萬行首楞嚴經

大佛頂如來密因修證了義諸菩薩萬行首楞嚴經合論卷第一

天竺沙門般刺蜜諦譯

烏菴國沙門彌伽釋迦譯語

正義大夫同中書門下平章事房融筆受

筠溪沙門德洪造論

東吳沙門正受釐論入經并刪補

首楞嚴，此云健相。涅槃經曰：「首楞者，名一切畢竟。嚴者名堅。」堅即健相，不可變壞故。一切畢竟者，生滅滅盡故。

【經文資訊】卍新續藏第 12 冊 No. 0272 楞嚴經合論

大般涅槃經卷第二十七

北涼天竺三藏曇無讖譯

師子吼菩薩品第十一之一

善男子！

首楞者名一切畢竟，嚴者名堅，一切畢竟而得堅固，名首楞嚴，以是故言首楞嚴定，名為佛性。

【經文資訊】大正藏第 12 冊 No. 0374 大般涅槃經

金剛三昧經 真性空品 第六

北涼失譯人名

佛言：

「令彼鈍根，受持一四句偈，即入實諦。

一切佛法，攝在一四偈中。」

舍利弗言：

「云何一四句偈？願為說之。」

於是，尊者而說偈言：

「因緣所生義，是義滅非生；

滅諸生滅義，是義生非滅。」

爾時，大眾聞說是偈，僉大歡喜，

皆得滅生滅，生般若性空智海。

【經文資訊】大正藏第 09 冊 No. 0273 金剛三昧經

大佛頂如來密因修證了義諸菩薩萬行首楞嚴經卷第三

唐天竺沙門般刺蜜帝譯

妙湛總持不動尊，首楞嚴王世希有，  
銷我億劫顛倒想，不歷僧祇獲法身。

願今得果成寶王，還度如是恒沙眾，  
將此深心奉塵刹，是則名為報佛恩。

伏請世尊為證明，五濁惡世誓先入，  
如一眾生未成佛，終不於此取泥洹。

大雄大力大慈悲，希更審除微細惑，  
令我早登無上覺，於十方界坐道場，

舜若多性可銷亡，爍迦囉心無動轉。

【經文資訊】大正藏第 19 冊 No. 0945 大佛頂如來密因修證了義  
諸菩薩萬行首楞嚴經

# 樂邦文類 卷第四

四明石芝沙門宗曉編次

## 唯心淨土文

姑蘇禪師守訥

禪師姑蘇鄭氏子，其族顯官。少依圓照禪師，得大徹悟。唱道宣城，緇素欽敬。先自天衣懷禪師以下，專用淨土法，遞相傳授，皆遂往生，各有明驗，具載《寶珠集》。師有《唯心淨土文》，今錄于此。

佛說極樂淨土，普勸娑婆群生，應當發願，生彼國土。然學頓者，拂之為權說；不通理性者，泥之於事相。吾嘗學唯識，唯遮外境，識表自心；心外無境，境全是心。心法遍周，淨土豈離乎當念？生佛同體，彌陀全是於自心。總攝有情，誠無凡聖之異；融通法界，寧有遠近之區。首楞嚴經，心存佛國，聖境冥現；唯闡提無信根者，則十萬億佛土，遠隔他方之外矣。天衣懷禪師，一生迴向淨土。問學者曰：「若言捨穢取淨，厭此忻彼，則取捨之情，乃是眾生妄想。若言無淨土，則違佛語。夫修淨土者，當如何修？」復自答曰：「生則決定生，去則實不去。」若明此旨，則唯心淨土，昭然無疑。論云：「智習唯識通，如是取淨土。」願諸同志，決定求生。政和三年癸巳，比丘（守訥）敘。

天親《金剛般若論》偈曰：

智習唯識通，如是取淨土。

非形第一體，非莊嚴莊嚴。

論自釋云：

「智習唯識通」者，此明真土。諸佛無有莊嚴國土之事，諸佛唯有真實智慧。習識通達，則是修習無分別智，通達唯識真實之性故。

「如是取淨土」者，即修此智，習唯識通。菩薩之人，乃取得淨土之果故。

「非形第一體」者，此句明淨土體。不自生滅，為淨土形。乃以真實第一義理故，淨土體故。

「非莊嚴莊嚴」者：一形相土，即水鳥樹林等事莊嚴也。二法性土，即是正智證契真如無漏功德，無有形相為莊嚴也。

【經文資訊】大正藏第 47 冊 No. 1969A 樂邦文類